

PEDRO REMBICUACHIA YIPINDAR VAHE SAN PEDRO

Pedro mahenduhasa Jesús reroyasar opacatu rupi oñemosai vahe upe

¹ Che, Pedro, Jesucristo apóstol aicuachía co che ñehe pëu, pe Tüpa rembiporavo pe recua pipe sui peñemosai vahe ivi Ponto, Galacia, Capadocia, Asia iyavei Bitinia rupi peico vahe upe. ² Supi eté pe yande Ru Tüpa rembiporavo yipisuive peico semimbotar rupi. Evocoiyase oEspíritu Santo pipe pe peha oyeupe nara viroyasar pe reco água ‘imoatiropri toyuvirecoi che Rahir ruvi pipe oangaipagüer sui’ oya. Peipisi catu Tüpa porovasasa pe reco tupri água.

Tüpa suindar mbahe aviye vahe rãrosa

³ ¡Imboetepri tasecoi Tüpa, yande Yar Jesucristo Ru! Ahe niha oporoparaisuerecosa pipe yande recocuer mbopiasu. Ëgüe ehi yandeu Guahir Jesucristo ocuer-ayevisé. Ipípe sui yaicuaño ité oimera mbahe aviye vahe Tüpa suindar yandeu. ⁴ Ipípe sui avei Tüpa oipisi ucara pëu pe mombahesa ivave yapocatupri nocañi vahe rã, ndituyui vahe rã iyavei ndopai vahe rã ité. ⁵ Pe peyeroya ité Tüpa rese. Sese niha ahe opiratasa pipe pe repi mbahe tēi sui poropisirosa pe reco água. Ahe vireco vahe imoingatupri ari ipa vahe mboyecua água pëu.

⁶ Co rese peyembovihareteño peico, yepe cūritei pe reco pipe peparaisu pucu raimi tēi setá pe recoãhasa pipe peico viña. ⁷ Esepia, pe yeroyasa Tüpa rese aviye oro, ahe sãhasa tata pipe yepi. Ëgüe ehi aveira pe recocuer sãhambri tata nungar mbahe yavai vahe pipe, “¿Aviye vahe ité pãha?” hesave. Yañemosase evocoi mbahe yavai

vahe upe, ahese yande yeroyasa aviye catura oro ocañi tēi vaherā sui. Ēgüe yahese, “Che rese pe yeroyasa aviye ité” ehira yande Yar yandeu. Ahese yarecora teco porañetesa iyavei imboeteipri yaicora acoi Jesucristo oyevisē curi.

⁸ Pe niha pesaisu yande Yar Jesucristo, yepe ndape-sepiai viña; cūritei rumo sepiaēhi pipe peyeroya sese. Sese pereco ité pe viharetesa tuvichá, aviye catu vahe, ndapeicatui vahe ahe imombehu. ⁹ Esepia niha, pesupiti pe remiaro poropĩsirosa apirēhi vahe peico pe yeroyasa pipe.

¹⁰ Aracahe suive ava Tūpa ñehe mombehusar oicua tupri pota ité co poropĩsirosa resendar yuvireco ‘¿mara ehi eté pĩha co tecocuer?’ oyapave yuvireco. Iyavei oñemoñeta yuvireco Tūpa oporoaisusa pipe pēu mbahe ombou vaherā rese. ¹¹ Cristo Espíritu senondeve oicua uca mbahe Tūpa ñehe mombehusar upe aipo ehi: “Poropĩsirosar oyemombaraisu ranera, ipare rumo teco orisa porañete vahe oimera” ehi chupe aracahe. Sese, “¿Umara pĩha evocoi mbia?” ehi; “¿Mbahesera vo oimera co Espíritu remimombehu yandeu?” ehi yuvireco. ¹² Tūpa rumo omboyecua chupe, ndahei chupe nara ité imombehupri yuvireco, pēu nara ité rumo. Ahe avei niha poropĩsirosa resendar ñehesa mombehusar omombehu pēu cūritei, Espíritu Santo pĩratasa pipe imboupri iva pendar yandeu. ¡Tūpa rembiguai avei oicua tupri pota tēi cūritei yuvireco viña!

Tūpa yande poravo yande reco maranehi āgua

¹³ Sese pe pĩhañemoñeta tuprisa pipe pemahemoha tuprira peyese Tūpa porovasasa pēu ombou vaherā rese pe yeroya catu āgua acoi Jesucristo oyevisē curi. ¹⁴ Tahir iporeroya vahe pe recosa pipe ndapeicoi chira mbahe pe remimbotarai pipe, acoi pereco vahecuer peyese Tūpa

recocuer cuaẽhi viteseve. ¹⁵ Peicora rumo pe reco maranehisa pıpe ite. Esepia, Tupa pe poravo oyeupe nara; ahe ndaseco marai vahe ite. ¹⁶ Supi ete icuachiapri aracahendar pıpe aipo ehi imombehu: “Pe tapeico seco maranehi vahe. Esepia, che ndaseco marai vahe aico” ehi.

¹⁷ Tupa niha opacatu ava upe secocuer rese nom-boyoviratiı chira oporandu curi, sese pe, “Che Ru” peye vahe chupe peyembosiquiyera mbahe teı apoehi agua imboeteisave co ivi pıpe peico vitese. ¹⁸ Esepia, Tupa pe pısiro aracahendar pe ramoı suindar aracuasa egue ehi teı vahe sui. Peicua tupri ite niha co poropısirosa repri nimboepisai ete que mbahe ocaıı teı vaheı pıpe inungar oro, anise guarepochira viıa. ¹⁹ Imboepisa rumo Cristo ruvi maranehi pıpe. Ahe seropovehepri, inungar ovesa nimarai vahe. ²⁰ Ahe Tupa oiporavo aracahe ivi, iva apoehi viteseve egue ehi vaheı. Cırıteı rumo oyemboeyecua peı mbahe tupri agua. ²¹ Secocuer sui niha peroya Tupa peico, ahe omboguerayevi vahe omano vahe paıu sui, ipare omondo oyemboeteisa, guıco poraınetesa aveı chupe. Ipipe sui peyeroya Tupa rese iyaveı pesaro co mbahe aviye vahe pısi agua ichui.

²² Cırıteı Tupa Nehengaguer supı tupri vahe mboyeroyasa pıpe imoatırosa pe recocuer pesaısu vaheı ambuae Jesuı reroıasareta. Evocoyase egue peyera peyeaısu catu opacatu pe pıhaııemoıeta tuprısa pıpe, iyaveı opacatu pe pıratasa pıpe. ²³ Pe niha pereco tecovesa pıasu, ndaheı pe yesupa omano teı vahe suindar. Ahe rumo Tupa Nehengaguer supı tupri apıreıhi vahe reroya pıpe. ²⁴ Esepia, icuachiapri aracahendar pıpe aipo ehi:

“Opacatu ava inungar caha, iyemboeteisa evocoyase inungar ipotrı.

Ipare ahe caha opa omano, ipotrı aveı opa ovıapi;

²⁵ Tūpa Ñehengagüer rumo apirēhi vaheṙā ité yepi” ehi. Ahe co ñehesa imombehupri poropĩsirosa resendar pēu nara.

2

¹ Sese peseya opacatu mbahe naporai vahe; opacatu porombopasa tēi, pe reco tupri angahu tēisa, ambuae ava mbahe pota raisa, iyavei opacatu mahechiroi resendar.

² Inungar pĩtanimi ocuacua āgua oipota cambi; ēgüe peye aveira pe querēhisa pipe Tūpa Ñehengagüer rese pe yembohe catu iri āgua, peico tupri āgua poropĩsirosa pipe, ³ que peicua itese yande Yar reco aviyesa.

Cristo inungar ita ndopai vahe

⁴ Peyemboya catu yande Yar rese. Ahe inungar ita ndopai vahe. Ava rumo oviroĩroño yuvireco. Tūpa rumo ahe ita oiporavo aviye catu vahe. ⁵ Ēgüe ehira pe rereco oyeupe inungar ita ndopai vahe; ipipe sui omopuhara otūparoguā pe rese. Iyavei pahi ndaseco marai vahe nungar peicora semimbotar rupi chupe. Pe evocoyase Jesucristo rembiapo pipe sui peyapora Espíritu upendar mbahe aviye vahe. Ahe inungar mbahe seropovēhepri aviye vahe Tūpa upe. ⁶ Esepia, icuachiapri aracahendar pipe aipo ehi:

“Che amondo ñepeit ita nungar ava aviye vahe tecua Sión ve imoviracua āgua.

Ahe che rembiporavo iporañete vahe, imboeteipri.

Acoi oyeroyá vahe sese, ahe nochĩ chietera ichui” ehi.

⁷ Pe seroyasar peico vahe upe evocoi ita aviye vahe ité. Seroyasarēhi upe rumo imboaviyesa co ñehesa aipo ehi vahe:

“Oĩ aposar rumo viroĩroño co ita yuvireco.

Ahe ita rumo coiye vĩracuasa aviye catu vahe”

ehi. ⁸ Iyavei omboaviye aipo ñehesa:

“Co ita oipihapi oiti uca ava” ehi. Esepia, Tūpa suindar ñehesa reroyaēhi pīpe sui oyemondo uca mbahe tēi pīpe yuvireco. Ēgüe ehi vaheṙā ité rumo ahe secocuer yuvireco.

⁹ Pe rumo ava oyesuindar nungar iporavopri peico Tūpa uve nara, imborerecuasa upendar pahi, iyavei chupendar ava seco maranehi vahe peico. Ēgüe peye Tūpa reco pīratasa mombehu āgua peico. Esepia, ahe pe renose pītumimbisa nungar pe recocuerai sui tesapesa aviye vahe pīpe pe reique āgua. ¹⁰ Yipīndar ndahe vītei eté Tūpa upendar ava peico, cūrītei rumo ahe ité peico; yipīndar ndaperecoi Tūpa poroparaisuerecosa, cūrītei rumo pereco ité cute.

Peico catu Tūpa mboetei āgua

¹¹ Che rivireta, che rembiaisu, peico raimi tēi vahe co ivi pīpe, pepoi opacatu co ivi pīpendar pe pīhañemoñeta raisa sui. Esepia, pemomara uca tēi pe recocuer ipīpe. ¹² Pereco tupri pe recocuer aviye vahe ava Tūpa ndoicua vītei vahe rovaque. Yepe ava remieroĩro peico inungarra mbahe tēi aposar viña, osepiase rumo pe rembiapo catupri, omboeteira Tūpa yuvireco ahe ari pīpe acoi yande Yar oporanduse opacatu ava recocuer rese curi.

¹³ Yande Yar raisusa pīpe pemboyeroya opacatu pe rerecur co ivi pīpe: que mborerecur guasu ivate catu vahe, ¹⁴ anise yivirindar. Ahe pe recua pīpendar rārosar imondopri ava naporai vahe mombaraisu āgua, iyavei ava seco catupri vahe upe, “Aviye nde recocuer” he āgua. ¹⁵ Esepia, Tūpa oipota pe peyapora mbahe aviye vahe ava mbahe ndoicuai vahe upe, ndayaracuai vahe upe pe rese iñehe-ñehe tēiēhi āgua.

¹⁶ Peico tupri ava rovaque mbiguai tēi nungar sui senosepri pe recosa pīpe. Ndiyai rumo ipīpe peyapo

iri mbahe tēi. Peico tuprira rumo Tūpa rembiguai pe recosa pipe. ¹⁷ Pemboeteira opacatu ava. Pesaisu catu pe rivireta Jesús reroyasar; pemboetei Tūpa; pemboyeroa avei mborerecuar guasu.

*Yembohesa yande Yar Jesucristo mombara*isu agüer re-sendar

¹⁸ Pe, ava rembiguai, pemboyeroa catu pe rerecuar imboeteisa pipe que seco catupri vahe, que ndaseco pōrai vahe avei. ¹⁹ Esepia, aviye catu yañemosase mbahe-mbahe tēi ava rembiapo upe Tūpa mboyeroa tuprisa pipe. ²⁰ Mbahe tēi aposa pipe rumo pe mombara^{is}use yuvireco, ndipoi eté evocoyase ichui mbahe aviye vahe peñemosase evocoi nungar mbahe upe. Co rumo acoi mbahe tupri aposa pipe pe mombara^{is}use yuvireco, ipare peñemosase chupe, ahe rumo aviye catu itera Tūpa upe. ²¹ Pe para^{is}u āgua rese niha Tūpa pe poravo. Esepia, Cristo oyemombara^{is}u pe recocuer rese. Ahe rane ēgüe ehi pe rese pe secocuer moña āgua. ²² Ahe ndoyapoi vahe ité angaipa iyavei ndoporombopai vahe ité. ²³ Acoi ava iñehe mara-mara tēise yuvireco chupe, nomboyevii eté iñehe raisa. Iyavei acoi omombara^{is}use yuvireco, “Ayepira sese” ndehi eté. Ahe rumo, “Che Ru Tūpa seco ñvi vahe oicua^{ra} chupe yuvireco” ehiño oyeupe mbahe-mbahe tēi aposar upe. ²⁴ Cristo teieté viraso yande angaipagüer güete pipe curusu rese ‘toyepepi angaipa sui yuvireco. Ipipe sui toyuvirecoi teco ñvisave’ oyapave yandeu. Ahe niha yapichapri secoi pe recocuer moingatu āgua. ²⁵ Esepia, pe niha yipindar inungar ovesa ocañi tēi vahe peico viña. Cūritei rumo peyevi Cristo upe. Ahe pe recocuer osāro cūritei inungar ovesa rārosar.

3

¡Mara ehira ava omenda vahe recocuer yuvireco?

¹⁻² Ĕgüe peye aveira cuña, pemboyeroya itera pe mer. Esepia, amove ndoviroya vitei Tūpa Ņhengagüer yuvireco; pemboyecuae rumo pe reco tuprisa imboeteisa avei chupe, avieteramo ahe avei viroyara, yepe ndapeñehei chira chupe viña. ³ Acoi pemboyecua potase pe yemoporañetesa ndahei chira pe rete rese inungar oāca rese mbahe omoporañete ai vahe, ndahei chiaveira pe yemondesa sendi yai vahe oro nungar, que turucuar porañete catu vahe. ⁴ Iya rumo pe aviter pipe sui mbahe porañete ipocopi vahe pemboyecua pe reco mbegüemisa iyavei pe recoasiēhisa pipe. Evocoi nungar aviye catu ité Tūpa rovaque. ⁵ Ĕgüe ehi avei cuña seco catupri vahe güeco porañetesa imboyecua aracahe. Ahe oyeroya Tūpa rese yuvireco, omer avei omboyeroya yuvireco. ⁶ Inungar Sara aracahe, omboyeroya ité omer Abraham, “Che yar” ehi chupe. Pe inungar ichuindar peico peyapose mbahe aviye vahe pe siquiyeēhisa pipe.

⁷ Iyavei pe imer, pereco mbegüera pe rembireco upe. Pemboeteira sereco. Esepia, ahe nipirata tuprii, iyavei Tūpa omboura güeco tuprisa pipe tecovesa apirēhi vahe oyoya voi pēu. Ĕgüe peyese, Tūpa osendu itera pe yeruresa.

Paraisusa mbahe tupri aposa rese

⁸ Iyavei na peyera pe opacatu peyese inungar ñepei oñemu vahe. Oyoya tupri mbahe tapeyandu. Peyeaisu catura Jesús reroyasar pe recosa pipe. Peyemboavara oyeupe pe reco mbegüesa pipe. ⁹ Oyapose ava que mbahe tēi pēu, anise que oñehe raise, ndapemboyevii chira chupe. Iyacatu rumo mbahe tuprisa pipe pemboyevira

chupe. Evocoi nungar mbahe apo ãgua niha Tũpa pe poravo 'toipisi che porovasasa' oyapave. ¹⁰ Esepia, "Peipotase pe recocuer aviye tupri ãgua pe yemboviharetisa pipe, pemombituhu pe ñehe raisa iyavei ndapeporombopai chira.

¹¹ Pepoi aveira mbahe tũi sui, pesecara mbahe aviye vahe. Peseca teco tuprisa peyeupe nara, peguata supi.

¹² Esepia, supi eté, yande Yar osãro ava seco catupri vahe iyavei osendu oyeupe yeruresa.

Ava mbahe tũi aposar rumo ndoipisii eté" ehi.

¹³ Ndipoi chira revo que ava mbahe tũi oyapo vahe pe recocuer upe yuvireco, pequerẽhise mbahe aviye vahe apo. ¹⁴ Peparaisuse rumo mbahe pe rembiapo aviye vahesa rese, ¡sovasapri peico! Peyembosiquiyei rene que ava sui. ¹⁵ Pemboeteĩnora rumo Cristo pe Yar secosa rese pe piha pipe. Peyemoingatu voira ava pe remiaro rese oporanduse pũu pe querẽhisa pipe imombehu tupri ãgua. ¹⁶ Ēgũe peyera rumo pe reco mbegũesa pipe imboeteisave. Peico tupriira pe pihañemoñeta tupri rereco. Acoi que oñehe rai vahe pe Cristo reroyasa recocuer rese, ahe yuvinochira oñehe sui curi.

¹⁷ Tũpa oipotase pe yemombaraisu, aviye catu mbahe aviye vahe apo pipe yepi mbahe tũi apo rãgũer sui.

¹⁸ Esepia niha, Cristo teieté omano yande angaipa repirã ñepei reseve. Gũeco maranehi pipe ěgũe ehi ava recocuerai rese opacatu pe reraso ãgua Vu Tũpa upe. Ahe omano gũete rese. Ipare rumo ocuerayevi gũeco espĩritu pipe. ¹⁹ Gũeco espĩritu pipe avei oso, omombehu Vu Tũpa remimbotar ava hã soquendapri yuvirecoi vahe upe.

²⁰ Ahe ava Noé recosendar ndiporeroyai vahe yuvireco aracahe. Tũpa osãro gũeco mbegũesa pipe secocuer moingatu ãgua viña Noé oyapo viteseseve arca oico. Ahe ipipe oñepisiro ochomi tũi yuvireco amarusu sui. ²¹ Ahe

i osãhangapo i poroãpiramosa, ahe omboyecua yande ipĩsiropri yande recosa. Poroãpiramosa rumo i pipe ndahei yande rete moatiro ãgua. Co rumo yaporandura Tũpa upe, yande pihañemoñetasa moatiro ãgua. Ipipe sui evocoyase yañepisirora yande Yar Jesucristo cuerayevisa pipe. ²² Ahe oso ivave uguapi oĩ Vu acato coti. Opatatu sembiguai eta, mborerecuareta, opacatu imborerecuasa ipĩrata vahe avei ipovri pendar yuvirecoi.

4

Yandehañeco yandeyese mbahecuasa Tũpa suindar yaipisi vahe pipe

¹ Cristo oiporara mbahe rasicuer güete rese. Pe avei evocoyase peyemoingatu voi ãgüe peye vaheã peico chupe nara. Esepia, acoi ava oyemomborara vahe güete pipe oseya angaipa yuvireco. ² Ipipe sui ndoyuvireco iri chira ari rupi ava tẽi pihañemoñetasa pipe. Tũpa remimbotar rupi eté rumo oyapo pota mbahe co ivi pipe yuvirecoi viteso. ³ ãgüe peye pucu rane niha pe rembiapo ai pipe peico ava Tũpa reroyasarẽhi recocuer nungar rupi tupri. Ahese mbahe-mbahe tẽi peyapo pe pihañemoñeta raisa pipe, savaiposa, pietasave pe rãse tẽi pipe pe aracuasa pemocañi pe ihu tẽisa pipe, pemboetei avei mbahe rahanga tẽi peico. ⁴ Cũritei rumo pe mboriparer, ndoyembovĩhai tẽi pe rese, ndapeico irise supi semimbotarai apo ãgua. Ahe oñehe-ñehe tẽi yuvireco pe recocuer piãsu rese. ⁵ Ahe chupe rumo oimera porandusa. Esepia, yande Yar oyemoingatu opacatu ava recocuer rese oporandu ãgua omano vahe upe, oicove vite vahe upe avei curi. ⁶ Sese niha co ñehesa piãsirosa resendar imombehusa ava omano vahe upe. Yepe omano co ivi pipe inungar opacatu ambuae ava oangaipa repirã, iespĩritu rumo yuvirecoi apirẽhi inungar Tũpa.

⁷ Virovi rumo ari ipa vahe oico, sese pe yapisacasa pipe pepihañemoñeta tupri iyavei peyerure catuño ité pe yeroya tuprisa pipe. ⁸ Co catu opacatu tupri ité peyeaisura pe piha pipe. Esepia, êgüe yahera poroaisusa pipe yande ñero voira seta ava yangaipa vahe upe. ⁹ Peipisi tupri ava yuviraso vahe pe rêtave; “¿Mbahe rese piha co ou?” peyei rene pe pihañemoñeta pipe pe piri ou vahe upe. ¹⁰ Ñepeipei yande yaiporura Tûpa suindar mbahecuasa yareco vahe ambuae Jesús reroyasar rese hañeco tupri âgua. Yaiporu tupriira co Tûpa porovasasa setá vahe yande cuaita mboaviye tupri âgua. ¹¹ Acoi pemombehuse Tûpa suindar mbahe, pemombehura inungar iñehe ité; acoi peporopitivii potase, peyapoño opiratasa pëu Tûpa ombou vahe pipe. Opacatu mbahe peyapo vahe peyapo ‘tomboetei ava yuvireco Tûpa yande Yar Jesucristo rembiapo pipe sui’ pe hesa pipe. Esepia, chupendar ité imboeteisa iyavei imborerecuasa. Êgüe tehi apirêhi vaherã ité.

Yemombaraisusa Cristo reroyasar yande recosa pipe

¹² Che rivireta, che rembiaisu, ndapeyesapiha ucai chira, acoi oimese mbahe-mbahe tõi yande recoãhasa pëu ‘ndoyavii, ndipoi chietera evocoi nungar mbahe cheu viña’ pe hesa pipe. ¹³ Yayembovihareteñora rumo ipipe. Esepia, yande rereco yande Yar yemombaraisu agüer nungar pipe yuvireco. Evocoyase yayemboviharete itera acoi yande Yar oyevisë güeco pïratasa pipe. ¹⁴ Iñehe marase yuvireco pëu Cristo reroyasar pe recosa rese, sovasapri peico. Esepia, Tûpa Espïritu güeco porañetesa pipe seci eté pe rese. ¹⁵ Acoi pe pãhu pendar omombaraisuse yuvireco, ndahei chira rumo iporapichisa rese, ndahei chiaveira imondasa sui, que mbahe tõi aposa rese. Ndahei chiaveira que ambuae ava mbahe rese iñemañeco tõiisa sui

ëgüe ehira serecosa. ¹⁶ Co rumo acoi peparaisuse Cristo reroyasar pe recosa pïpe, ndapechĩ chietera. Pesapucaira rumo Tũpa upe imboeteisa pïpe serer pereco vahe rese.

¹⁷ Esepia, oyepota ité ari Jesús reroyasar upe rane ité tecocuer rese porandu ãgua. Ëgüe ehise yandeu, mbahe tēi catu itera Jesús reroyasarēhi upe. ¹⁸ Yavaise seco catupri vahe upe iñepisiro ãgua, ¿mara ehira pĩha ava ndaseco pōrai vahe ava angaipa viyar yuvirecoi vahe upe? ¹⁹ Sese peyemomborase Tũpa remimbotar rupi, iyacatu peguataño itera mbahe aviye vahe pïpe. Iyavei peyemondo itera yande Aposar upe ahe pe hã rãro ãgua. Esepia, ahe niha yeroyasa ité seci.

5

Aracuasa Jesús reroyasar upe

¹ Che amboaracua pota pe pãhu pendar Jesús reroyasar rãrosar. Inungar avei niha che aico iyavei asepia vahe ité yande Yar mombaraisu agüer. Inungar ahe vireco teco orisa, ëgüe ahe aveira acoi yande Yar oyevise curi. ² Pesãro tupri catu Tũpa upendar ava eta pe remiaro co omondo vahe pēu inungar ovesa rese yangarecuar osãro tupri vahe ovesa; peyapora pe querēhisa pïpe ité. Ahe niha Tũpa oipota, ndahei ambuae yande cuaisa pïpe tēi, ndahei avei guarepochi pota raisave yayapo. Yayapora rumo mboraviqui yande querēhisa pïpe ité. ³ Ndapeicoi chira pe remiaro upe inungar que mborerecuar güeco ivatesa pïpe oporocuai pĩrata vahe. Pemboyecuaara rumo pe recocuer aviye vahe chupe imbohesa tupri pïpe. ⁴ Evocoyase acoi oyevise yande Yar, yande rãrosar ivate catu vahe, ahese peipisira mbahe porerecosa, teco ori porañete apirēhi vahe.

⁵ Iyavei no pe mbia chĩhivahe, pemboyeroyara ava pe rãrosar peico. Iyavei opacatu peyemboyeroyara pe reco mbegüesa pipe peyeupe peico. Esepia, “Tũpa ava oyecomboivate ai vahe amotarẽhimbar secoi; ava seco mbegüemi vahe upe rumo ombou oporovasasa” ehi.

⁶ Peyecomombegüe catu peico Tũpa pĩratasa povrive. Evocoyase pe reco mboivatera curi. ⁷ Opacatu mbahe rese pe pihañemoñeta atisa pemombehura Tũpa upe. Esepia, ahe pe rãrosar ité secoi.

⁸ Pearacua cañii rene peyesui, pemahemoha ari rupi peyese. Esepia, pe amotarẽhimbar Carugar pe reco momara pota yepi inungar yaguar oñaro vahe oguata tẽi oporoeca ‘tamomara ava’ oyapave. ⁹ Sese peyemoviracuara Tũpa rese pe yeroyasa pipe Carugar upe. Esepia, peicua niha opacatu rupi avei yande rivireta Tũpa rese yuvirecoi vahe iparaisu co nungar mbahe pipe. ¹⁰ Peparaisumi pare rumo, Tũpa teieté pe reco mohivi tuprĩra, iyavei pe reco moviracuara, pe momirata aveira pe yepipi iriẽhi ãgua ichui. Ahe niha oporovasasa pipe yande poravo oyeupe nara, yande yaso vaherã supi teco ori ndopai vahesave yande Yar rese yande recosa pipe. ¹¹ Ëgüe tehi tasecoi güeco pĩratasa apirẽhi vahe pipe.

Mahenduhasa ipa vahe

¹² Yande rivri Silvano omboaviye tupri vahe ité ocuaita yepi, ahe che pĩtiviisa pipe co ayapo imondo che rembicuachía ndipucuiimi vahe pe mboaracua catu ãgua ‘ipipe toicua tupri catu yuvireco co porovasasa oipisi vahe, supi eté omboyecua vahe Tũpa poroaisusa’ che hesave. ¡Peyemoviracuara tupri ité sese!

¹³ Iyavei Babilonia pendar Jesús reroyasar yuvirecoi vahe oyoya vahe pe rese iporavopri, ahe ombou omahenduhasa yuvireco pẽu. Marcos, che rahir nungar avei

1 SAN PEDRO 5:14

13

1 SAN PEDRO 5:14

imahenduha pe rese. ¹⁴ Peyeovaupite “avirave” apo pe yeaisusa pipe.

Tapereco tecocuer tupri yande Yar Jesucristo rese peico vahe. Aipo rupive.

Tüpa Ñehengagüer

New Testament in Guarayu (BL:gyr:Guarayu)

copyright © 2011 Wycliffe Bible Translators, Inc.

Language: Guarayu

Translation by: Wycliffe Bible Translators, Inc.

Guarayu [gyr], Bolivia

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guarayu

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 14 Jun 2022 from source files dated 30 Nov 2021

c27c2d97-c359-59f5-b367-83efb2e33739